

109 學年度閩南語朗讀篇目

編號 1、老母對囝兒的期待

黃美華

坐佇『阿羅哈』頂頭，我送你來到林口龜山。看社會 經濟遮爾標，無薪假一直放。雖罔咱佇厝內已經參詳好勢，你嘛決定欲來遮讀冊。毋過規路你攏無講半句話，面上嘛無半點笑容。看你毋情毋願的眼神，我心肝內嘛誠艱苦。這是你第一擺離開厝內欲去外口蹕。逐日攏佇身軀邊，阿母阿母一直叫的細囝，這馬嘛欲離開厝矣！雖罔誠毋甘，我嘛毋敢表現出來。

行到警大的大門口，你共我講「：阿母，你會當轉去矣！」講了你越頭就行。看你遐爾仔無歡喜的眼神，我的心肝就親像針咧搥。這種情形，我嘛無法度按呢越頭就轉去。我恬恬綴佇你的後壁，等甲你共手續辦好，入去宿舍，我才去坐車。欲轉來進前，我交代你毋通簽刑事系。毋過佇欲 轉來的車頂，就接著你敲來的電話，講你已經簽刑事系矣，你閣講做警察本成就是欲為民服務，若無做刑事，是欲做啥？

這工是家長會，我佻翁婿做伙參加。看你喙笑目笑，皮膚嘛加真好。你講佇警大生活真嚴格。早起六點就愛起 床，暗時十一點就關電火。拜一到拜五攏袂當出去外口。你閣講，遮的規定攏是你上無法度忍受的。毋過遮的校規，顛倒是阮序大人上愛的。感謝學校予遮的囝仔正常的生活，共逐个學生攏訓練甲遮爾將才。

畢業了後，你佇北部服務，工課真濟，按早起九點做 到半暝兩點。逐工攏真無閒，時常咧失眠。阿母雖罔人佇 南部，毋過心就若像綴佇你的身軀邊全款。逐暗若想著你 遐暗猶咧無閒，我嘛定定目睷金金煩惱到天光。好佳哉！ 你佇六月統一調動的時，調轉來高雄。你嘛真歡喜，會當轉來這個美麗的故鄉服務。你今仔日就欲開始佇高雄上班矣！透早天才拍殍光，阿母就起來共你熨衫。看你穿甲遐 爾擎紮，看你充滿自信的笑容，看你對未來充滿希望，我的心內嘛充滿感恩。感謝學校的栽培，感謝菩薩的保底，阿母嘛深深祝福你。阿母無向望你大富大貴，干焦向望你一切平安順利。

109 學年度閩南語朗讀篇目

編號 2、頭家佻辛勞

阿真

朋友啊，恁敢有錢拍無去的經驗？錢若拍無去敢閣揣 會轉來？若是有人拈來還，是毋是會予你歡喜甲強欲流目屎咧？

阿信是蹓佇臺南的水電師傅。彼工伊領薪水，心情樂暢就走去夜市仔𠵼𠵼咧，順繼食暗頓。七𠵼八𠵼，一下失覺察，薪水袋仔煞拍交落去。當當阿信發覺的時，伊隨親 像菁仔穰 khòk-khòk 從，共𠵼過的擔仔位齊巡過，頭家攏講：「無咧！無拈著。」一擺閣一擺揣規暝，薪水已經毋知 落對佗位去矣。

隔轉工早起，阿信頭殼犁犁、目睷 he-he 去到公司講欲請假。頭家娘看伊面色誠樸，自來毋捌咧請假的人講欲 請假閣目頭結結，頭家娘看毋是勢問一个真，阿信才姑不而將講出伊的薪水袋仔規包拍無去的代誌，閣安搭頭家娘有去報案矣，請頭家娘免操煩。免操煩？頭家娘心內咧 想，薪水拍無去，這個月就白做的矣，阿信是手面趁食的人，食穿攏靠這份薪水。頭家娘嘛足知伊的性，若閣發一 擺薪水予伊，阿信一定毋啦。

頭家娘隨想著一步，請派出所的警察先生鬥搬戲。就 通知阿信講有人拈著錢，請伊來領轉去。頭起先，阿信歡頭喜面叫是真的，三步做兩步走，來到派出所。阿信接過 薪水袋仔一下看，心內就起懷疑矣，共錢抽出來算算咧，「三萬四」，開喙就講：「這毋是我的，這一定是頭家娘送來的，愛還頭家娘！」警察先生看阿

信的反應，驚一趔，開喙就問：「你哪會知？」

阿信講：「原本彼包薪水袋仔伊有對拗，這包毋但無拗痕，連伊已經開去的三千箍嘛變倒轉來，天下間哪有遐好 的代誌？用跤頭跌想嘛知，這定著是好心的頭家娘啦！」就堅持欲共錢還予頭家娘。

好事傳千里，電視台放送了後，逐家攏咧會，講這馬 這個社會上欠缺這款的「頭家佻辛勞」啦！頭家真情照顧 辛勞，辛勞誠心對待頭家，和諧溫暖的勞資關係真正予人感動甲強欲流目屎呢！雖罔彼包內底貯三萬一的薪水袋仔猶是無揣著，毋過這個故事予咱看著人性上矯的一面。

109 學年度閩南語朗讀篇目

編號 3、種番薯飼鳥鼠

林淑期

「諄！哪會遮好空，這擺種的馬鈴薯，攏無予鳥鼠仔損蕩去？」茂伯仔聽著隔壁田的旺伯仔講話，就共予鳥鼠仔食甲賸一重皮的番薯掘出來予伊看，順繼應講：「煞毋知 我刁工佇田邊種番薯，共遐枵饑的鳥鼠飼飽矣。」這是我 佇電視看著的報導—「種番薯飼鳥鼠」。伊會按呢做，到底有啥款緣故咧？

原來這個茂伯仔，少年的時佇農會咧賣農藥。有一日，伊看外國的研究報告，講農藥雖然會當防治病蟲害，毋過，煞會破壞塗肉恰四箍輾轉的生態環境。伊知影這款嚴重性了後，毋但苦勸人較莫濺藥仔咧，閣堅心做好炁炁頭，開始用有機的方式來種作。

拄做的前幾冬，予人破壞的塗肉猶未復原，收成誠穰。厝邊隔壁攏笑伊是戇癡頭。茂孀仔嘛因為按呢，不時恰伊冤家，甚至趁伊無注意，偷偷仔噴藥仔。毋過，茂伯仔猶是真堅持，伊講：「收成欲好，塗肉著愛有肥；欲有肥，著愛倚靠咱環境的生態，才會當共對抗病蟲害的好菌恰好蟲 揣倒轉來。」毋過逐家攏誠懷疑，問伊講：「按呢戇戇仔等，是愛等佹久？」茂伯仔講：「逐塊地需要的時間攏無仝，上 無嘛愛等三冬，啊若水稻仔田欲轉做有機的，有的閣愛五、 六冬以上。」

人講，堅持就會看著希望，閣加上茂伯仔伊種的愛心番薯，這馬的收成予伊真滿意。看伊共一條一條予鳥鼠食 賸的番薯薹起

來，真得意共人講：「恁看，一條斤外重的番 薯就會當飼幾若隻鳥鼠，種番薯有影是一兼二顧，毋但我 的紅菜頭嬌噉噉，隔壁的馬鈴薯嘛逐粒讚！」伊閣講：「菜 市仔咧賣的紅菜頭攏生做差不多，我這號有機的有長有短、 有肥有瘦，逐條攏有家己的生張恰個性。」坐佇田邊的茂 孀仔，繼手削幾條仔分予人客食，看電視裡的人客攏呵咾 甲會觸舌，講一點仔臭腥味都無，食起來袂輸果子咧！予 我真欣羨，嘛足想欲試食看覓。

感謝這個趣味的報導，予我對有機農業有閣較深的認捌。